

徐公集

冊四

徐公文集卷第二十六

東海徐鉉

楊府新建崇道宮碑銘

洪州奉新縣重建閭業觀碑銘

洪州西山重建應聖宮碑銘

驪山靈泉觀碑

洪州延慶寺碑銘

楊府新建崇道宮碑銘

并序

有天地然後有萬物有萬物然後有君臣有君臣然後有教化教之大者當由其本則大道是已夫道積乎中動合於真故能舉堯舜周孔之法奮禮樂刑政之用若道不在焉而守其籒廬則莊周於是糠粃仁義輪扁於是糟粕古書矣夫孝本因心而宗廟簠簋所以致孝也道本勤行而宮館壇墀所以尊道也爲政者有能原聖人之旨以垂憲崇列真之宇以薦誠其殆庶乎廣陵大藩四海都會制度之盛

雄視諸侯土德既微三災斯

今上御名

井邑屢變城郭僅存

皇宋膺圖更造區夏雖天寶輔德亦世而後仁今上嗣位之六年詔太常博士孫君邁佐理斯郡君復膺古訓得意玄關以爲教之不與民之安仰於是相爽塏之地卽清曠之墟創朝修之宮奉玄元之御當崇墉之左次俯合瀆之東涯出俸錢以易置運心匠以經度班倕方集畚鍤既興未及僦功移典秋浦同聲之應千里非遙太子右贊善大夫潘君若冲負儒雅之才韞恬淡之量允膺朝選代撫斯民庶政交修能事畢舉惟茲靈宇既有成規於是揆日庀徒克終懿績若乃殿堂陞楯之制閤閤罕恩之列或躊躇以閑宴或辟篠而曼延睟容肅穆仗衛紛繹搖太霄之佩植紫旄之節拊洞陰之磬扣豐山之鍾歛若經閭風而歷琳房飄如排玄雲而揖丹露風亭月觀之地紫氣浮空歌臺舞閣之基芝英擢秀學者假筌蹄而有得游者甘樂餌而斯留靄然福鄉不變浮俗既畢雲

今上御名

乃楊王庭有詔賜名白崇

道大矣哉聖人在上墜典咸修自成嶠嶠之區何假崆峒之問是宜

刻於樂石紀在方書某也素爲道民嘗學史氏以文見屬所不獲辭
銘曰

大哉道原湛然常在其質無象其功不宰君子得之勤行不怠勤行
伊何啓煥靈場乃闢隙荒乃築宮牆峨峨高門屹屹崇堂祀事孔明
玄儀載光淮海惟揚九州之奧厥民伊何富庶而教夫仰靈今上人御名
知至道咨爾三方是則是效崑岡北峙刊水南通聖日麗天真氣盤
空煒煒煌煌魂魄熊熊道民作頌永播 皇風

洪州奉新縣重建闡業觀碑銘

并序

道之爲體也大大則衆無不容道之爲用也柔柔則物莫與校南方
之強也故冲氣之所萃異人之所生壇館之所宅景福之所興相乎
域中南楚爲盛先聖之論豈誣也哉洪州奉新縣闡業觀者案方志
西晉邑人劉真君之故居也真君名道誠以經明行修仕至刺史郡
守金行不竟仁獸非時知幾之賢有道之士卷懷而退修之於鄉玄
德陰功昭受靈貺故真君辭張邴之祿追茅許之風單車還家勤行

不息以永嘉二年八月十五日舉族上升藹爾福鄉依然舊址錦帷
乍降玉鳥長留後學瞻望若仲尼之闕里遺民思暮如召伯之甘棠
梁大大同元年乃建爲觀爾其豫章垂蔭洪井儲靈華林蒼翠當其
陽馮水清泠環其域煙霞韜映竹樹青葱居然人境之間自是仙游
之地載祀四百朝市三移封域之間英靈不泯鹿巾霞帔之士往往
冥升縉紳逢掖之流時時傑出存諸舊史是號名區土德旣微羣方

今上
御名

難城有復隍之患室多橈棟之凶乃眷殊庭俄悲閨戶而瓊蘊

之所祕霜鍾之所懸屹爾麗譙儼然對峙有道門都監余守徵者翦
除宿莽草創精廬苦節忘形五十餘載修心以化俗傳法以度人入
室弟子龔紹元吳紹甄皆能肅奏真科祇稟遺訓惟鄉人之善者知
歲計之有餘高士胡君名仲堯延慶簪纓息機丘壑師黃老之術以
虛方寸躬曾閔之行以睦閭門博施濟衆斯謂智以爲集靈之館祈
福之場陋而不度民將安仰於是揆時屬役卽舊謀新詢謀僉同跪
信咸萃增湫下爲爽塏易卑室爲崇

今上
御名

棟宇之設則因夫故基制

度之中則考於經法凡殿堂門闕居室廚廩延袤周徧殆且百區三
尊衆真羽儀侍衛精嚴肅穆不可爲狀履端闡造廣庭悅然如從汗
漫之游卽瑤階瞻玉座竦然若奉武夷之會旣而息徒已事日吉辰
良明祀以告成功精意以答真祐舉紫旄之節搖太霄之佩然九華
之燭奏空洞之章星斗迴光煙雲改色青天白日夫豈遠哉于時胡
君以姻睦之行慈惠之澤里閭稱舉郡國升聞詔書褒美特加旌表
揭以雙闕蠲其追胥江楚之間以爲盛事是知玄風之被俗聖政之
化人變魯至道見於今矣夫如是則可以傳芳金石垂裕昆雲俾乎
好道之徒益勵齊賢之志云爾其銘曰

大道無名得之爲真矯矯劉君知幾其神遜爾侯社上爲帝賓維梓
之地甘棠之人峙此仙祠章江之濱華表未歸桑田已改舊井誰泮
高臺尙在不見芝英猶芳蘭茝佳氣鬱葱如將有待彼美胡君州閭
之英世味道腴家傳義聲歸誠玉闕奉贄金籙易此積今上御名化爲殊

庭乃眷福鄉實惟南楚閑館相望鸞輪交午真圖祕錄唯仁是與刻

頌貞珉永歸終古

洪州西山重建應聖宮碑銘

并序

先儒有言曰山者宣也宣氣生萬物者也然則崇岳巨鎮蓋氣之雄者也其間靈峯奇岫又氣之粹者也是故帝以會昌神以建福感而生聖賢宅而爲洞天奇怪恍惚非尋常所能測已西山者作鎮荆楚雄視衡巫勢靡迤而崇高氣清虛而和暢動植滋茂樵隱閑安物軌之洪崖先生所居於此洪井之右澗水之濱喬木森羅古壇猶在長阜回抱是謂鸞岡北隅特高仍有伏龍之號唐乾元初山人申太芝上言其地有異氣詔於此立應聖之宮抗玄元正殿於其前塑肅宗聖容於其上繚垣觀闕仰法於紫宮路門納陛取規於丹禁光靈煥爛薦獻精嚴上士勤行守臣涖職秩之盛莫之與京廣明已還三災在運望拜之地闕而莫修遼東之鶴徒還絳縣之人已老甲辰歲有道士王守玄者緱山仙裔茅嶺名流受命藩侯來膺道任翦荆棘於高閼之址今上御名茅茨於隆棟之基不出焦光之廬自化庚桑之俗善

言彌遠馴致其功二十許年克甄舊制入室弟子劉德淳氣沖貌肅
節苦行高恪恭以居次謙和以接物既嗣其業遂成厥終又十餘年

締

今上御名

云畢凡內外殿宇百有餘區材用善良工藝堅密其藻飾也

不踰奢儉之節其廣袤也足展朝修之儀祕殿深嚴靈壇博敞睟容
穆若列侍參然鍾磬在懸茲芬具薦燦旭景於軒檻延夕月於甕題
蕭寥空洞之音希夷颺歛之御邈哉真境無得而名鉉爰在弱齡服
膺至道先君頃參戎乘嘗涖斯邦依然棠樹之人自是桐鄉之邑乃
以庚申歲遷奉松楸卜兆於鸞岡之陽敢言折臂之祥願占維桑之
地明年復以王事再至山中祠虛皇於游帷之宮投龍簡於天寶之
洞所經靈跡實契幽尋又是山有寶光初至之夕卽見於中峯之上
下至山麓倏忽聚散狀如野燎而精明眩目不可正視澗中有盤石
石有三藥曰歲端午日未曙前常有擣藥之迹餘滓在焉水流至此
甘香如蜜取以灌漱心府瑩然斯皆載於舊經親所覆視者也此山
登晨之士接武而洪崖爲之冠列仙之墟連屬而洪井爲之宗然則

閱風玄圃之在人間者也宜其篆刻金石永齊穹壤鄙儒不佞敢作銘曰

江之右楚之區峙靈岳爲仙都洪井濱鸞岡隅建清宮應真符廢而興神之扶宮旣成道旣行校三官朝百靈集景福薦皇明復淳化遂嘉生億萬年流頌聲

驪山靈泉觀碑

蓋聞遂古洪荒旣表大庭之車皇猷炳煥亦尊軒后之臺是知聖哲相因比千年於旦暮質文迭用歷三正以循環斯之謂至公斯之謂不朽頌聲所作冊府存焉若乃天地絪縕陰陽孕毓神臯天府莫爲王者之居靈液甘泉出奉聖人之用丹甌不炊而自熟溫谷不爨而自然神妙無方所以存而勿論蕩衰難老所以酌而不竭矧夫西都舊國東井垂芒終南太一寓其精洪河清渭均其潤湛然神井冠此崇山據九州之膏腴備萬乘之湯沐固可以蹄筌衆壑眈澮百川猗歟無得而稱已在昔唐之方有德也稟金壺之道訓受羊角之禎符

奄四海而爲家綿六葉而愈盛教宗玄默心寄窈冥卷領結繩幾致
華胥之俗鳴鑾弭節常從汗漫之期輿馬之音朝行而夕至玉帛之
會天動而雲臻孝惟奉先仁不忘本乃於山之北趾建華清之宮玄
元之御當陽而玉瑩五聖之象列侍而星環別館離宮連薨接棟朝
元長生紀其號霓裳羽衣播其聲至誠所通純嘏來應太平之運五
十斯年三代已還未始有也及夏庭兆釁戲水挺災因室之亂雖平
厭世之游遂往金莖露掌但有餘基樂水雲謠聊無嗣響而歸然真
宇儼若清都同光中初殄國讎永懷舊物載賡成制肅奉玄科因改
命曰靈泉之觀芝泥龍簡時修精禱之儀雲錦鳳羅歲度勤行之士
是知豐功盛業將歷運以有遷道捷玄關與虛元而共久累朝寅奉
五紀于茲素雲紫氣以常霏白鶴青牛而狎至國家朱光繼統綠宇
膺圖受白環於龜山得玄珠於赤水雖三秦父老猶牽望幸之心而
九服蒸黎重覩開元之日信皇天之輔德諒百祿之咸宜道士武又
玄冲氣內充仙才外挺紀綱道任啓煥靈場薦享惟嚴羽儀若舊琳

房浴殿如清蹕之時巡絳節珠旛想舟輿之下降幢幢御路弈弈宮
牆或乘輶建節之賓或觀藝探書之客陟瑤壇而增肅瞻玉坐以長
懷蓋仁風之所被者深故遺德之所加者遠是宜播爲雅頌告於神
明敢摛紫素之文恭鏤荅華之玉其辭曰

天地之氣宣以名山陰陽之英融爲溫泉聖人用之益壽延年同出
於道同謂之玄邈矣伊唐蒸哉六葉河圖帝錄鴻勳大業天秩孔明
真符屢接雲蓋亭亭芝房燁燁歸功聖祖過享清宮周垣繚野反宇
凌空孝思不匱道德惟公希夷有象肸鬻宜通數有推移世分今昔
屹爾雲御名上依然聖迹藹藹脩林湯湯神液備物莊嚴百祥繁錫至
哉坎德效此坤珍配靈上藥薦祉真人冥升自遠遺烈長新思玄之
老頌德之臣冥懷靡所用勒貞珉

洪州延慶寺碑銘

若夫名區勝境真靈之所徘徊通都大邑游居之所走望故其府朝
之制度里閭之延袤宮廟壇壇之肅禋祀薦享之嚴無不及焉必可

觀也豫章古郡通楚要津萬靈所宗百寶攸集龍劍之氣炳耀於列
星金冶之精騰光於峻岳飛錦帷於仙館植鐵柱於重陰方志所傳
奇蹤可見而故老復言晉元帝卽位之歲郡人有耕於東湖之良隅
者獲璃像焉其高三尺其狀殊異守臣上啓詔立等以處之歲紀迭
更薦奉無絕至唐大和三年文宗皇帝以夢寐通感特詔修崇有僧
普願者率勵衆力創造飛閣極高明之制盡臨觀之室瞻仰之徒勝
賞仍在會昌沙汰旋更殄夷時有寺主僧神確躬奉瑞容瘞于堂下
大中改制將復修完像遂堙沈求不可得而靈迹所在羣心未忘咸
通二年連帥嚴譔表請重建因紀誕聖之節署爲延慶之寺子來之
力雲今上御名如初廣明中巢寇亂常羣盜蜂起三災所及寺復焚如光
啓二年廉使王師甫卽其故基又加營繕自時厥後百載于茲市朝
屢更興廢不及各人上士增飾相因國家奄有寰區普恢教法人識
修心之旨家懷祈福之誠此邦之人素多尙信千里之地頻致豐穰
戶有餘貲居多暇日監寺僧智清勤行其道時省其庸推誠以化人

節用以成務峻其卑庠緝其傾頽改作正殿及廊廡共七間疎楹廣廈雕甍藻梲瑣牕洞戶珠網金鋪蹇產鴻紛深沈煥爛闕政備矣能事畢矣觀其康莊旁達閭伍綺分西則崇山隱天煙霞韜映乎其上前則平湖彌望魚鳥翔泳乎其中雖復觀雉接連車馬回合蕭然人外自遠世紛信乎棲息之場習靜之地也僧契緣攝贊其事不朽是圖伐石爲碑以文求我銘曰

至哉玄貺邈矣坤珍凝爲異像以祐斯民靈心所格精舍攸因其神或隱其迹寧淪廢興在運啓煥由人有美清師勤行其道彼都人士服義承教率是衆力完斯廟貌祕殿穹隆層軒竊窰勝事精嚴丹誠至到名山雄雄大江溶溶五侯之國千里之封靈場隱軫道氣明融神明所相有感必通刊名法宇永播無窮

徐公文集卷第二十七

東海徐鉉

洪州西山翠巖廣化院故澄源禪師碑銘

大宋舒州龍門山乾明禪院碑銘

大宋故天雄軍節度行軍司馬易府君神道碑

故唐大理司直鄂州漢陽令贈衛尉少卿樊公神道碑

洪州豐城縣李司空廟碣文

洪州道正倪君碣

洪州西山翠巖廣化院故澄源禪師碑銘

聖人設教賢者學之有能極深研幾剖疑析滯不肯本以矯激不恣波而流宕世人宗仰時君褒異斯可以爲君子矣禪師名無殷姓吳氏連江人也昔泰伯獲讓肇啓南藩至德所及流光百代子孫蕃衍吳越爲多至今爲著姓焉累世隱德鄉曲推重道氣鍾粹而生禪師幼異常童不染俗態年七歲從晉安雪峯真覺禪師出家二十詣開

元寺受度真覺之道見重於時禪師默識微言盡得要旨而復博考
 往行幽尋勝迹江浙諸郡靡不經遊先達推稱後生請益結轍連袂
 虛往實歸禪師以道貴冲用性復虛靜所止之處學徒俯千人輒復
 捨去晚歲止廬陵之禾山其名益彰季唐先主召見之特加禮遇俾
 居廣陵之祥光院嗣君踐祚優禮有加賜號澄源禪師命移處豫章
 之上藍西山之翠巖院是皆都邑之勝槩高人之游集自非密行淳
 德不能鎮服羣情我迭居之綽有餘裕雖身在巖谷而恩注帷展存
 省問遺使者相望享壽七十有七建隆元年春二月五日終于翠巖
 院甘露被樹數日不晞皓鶴盤空三周而去門弟子用西域之禮葬
 于院之巽隅封于其上恩旨褒飾名其丘曰大醫道俗孺慕會其葬
 者萬數鉉也趣捨異術聲塵致睽于時釋氏方盛師門未啓嘗侍嗣
 君宴語從容上言曰古稱千里一賢猶比肩也今號長者十數無
 乃多乎嗣君深以爲言因曰惟澄源禪師其殆庶矣無幾何以家門
 情禮請告至山會師已沒瞻仰遺像參迹行事乃信名不虛得亦表

君之知臣今來京都復與師弟子鑒琮相遇琮師志性端慤修習精勤肅奉成規博總衆藝慈惠救物時人稱之明詔賜號慧覺大師錫以紫服朝恩浹于累世實教門之榮觀也于時禪師委順三十年矣琮也思廣銘頌庶永遺風以鉉嘗學舊史見求直筆若夫褒善稱伐翰墨攸先載瞻西山實寄松檟敢抽祕思以告九原銘曰

芄芄東越武夷之區時生異人與古爲徒禪師出焉俊邁且都顯顯南楚西山作鎮真靈所宅教法斯振禪師居之允矣令問道無不在法非可名理超言象俗仰風聲豐碑載勒勝氣長生猗嗟來者用此爲程

大宋舒州龍門山乾明禪院碑銘

并序

山岳極天莫雄於灊霍川瀆紀地莫靈於江淮盤薄縈帶中畫郡國幅員數千里舒皖居其陽真聖之所躔次景福之所興作必有高士來闢妙門以導精粹之氣以恢淳和之俗則龍門山乾明禪院所以建也是山東去郡九十里蓋灊岳之一峯山有龍井郡人雩禱之所

靈應昭哲因以名焉深巖洞岫風雲之所畜泄湧泉清池璿碧之所
隱見涼颼爽氣五月可以披裘脩竹茂林四時未嘗易葉游方之士
至輒忘歸有曉遵禪師者家本宜春幼捐俗累從師訪道歷抵湘沅
探幽洞微得聖人之宗旨清心鍊行踵前作之風聲向道之徒靡不
宗仰乾德五載始來此山顧瞻林泉有懷棲息邑人宋仁瑗輟其隴
畝以奉宴居面壑臨流誅茅穿徑遠擬關令草樓之觀近同焦光蝸
牛之廬歲計有餘善言來應廬江人侯霸大施資賄以奉經營數年
之間蔚然崇御名上復廟重屋瑣牕洞戶藻以丹牖駢以璧璫所以重

威神也饗堂講肆疎楹高坐皓壁月皎層軒霞舒所以敷道義也前
則端闈瞰野旁則脩廊納陞廚廩充牣居室閑安閱經籍於巖房息
徒侶於奧寢棟宇延袤凡二百區蓋精誠之所憑實邑里之勝概也
今上嗣統像法大興禪師徒步神景對揚雲陞恩旨嘉賞賜號曰乾
明禪院華題鳳篆降自慶霄聖日天光煥乎幽谷夫道之行也時與
地并斯郡山水奇絕動植茂遂民情淳朴聖迹回環非明主至仁不